

史記

人物全傳

[2]

「纪传版二十六史」 国学网精校本

「西汉」 司马迁 撰



北京时代华文书局

史記

人物全传

[2]

世家

「纪传版二十六史」 国学网精校本

「西汉」 司马迁 撰 周殿富 主编 尹小林 点校



北京时代华文书局

图书在版编目 (CIP) 数据

史记人物全传 / (西汉) 司马迁撰. — 北京 : 北京时代华文书局, 2013. 12
(纪传版二十六史 / 周殿富主编)
ISBN 978-7-80769-198-3

I. ①史… II. ①司… III. ①中国历史—古代史—纪
传体 IV. ①K204.2

中国版本图书馆 CIP 数据核字 (2013) 第 293923 号

【纪传版二十六史】

史记人物全传

[西汉] 司马迁 / 撰

出 版 人 田海明 周殿富
主 编 周殿富 副 主 编 尹小林
执行主编 武 学 点 校 尹小林
责任编辑 宋 春 张 原 侯娟雅 张艳玲
特约编辑 李 莉 马小奔 李广超 孙懿新
装帧设计 张亚力 迟 稳
发行总监 张国平 营销总监 赵秀彦
责任印制 刘 银 范玉洁
出 版 时代出版传媒股份有限公司 <http://www.press-mart.com>
北 京 时 代 华 文 书 局 <http://www.bjsdsj.com.cn>
北京市东城区安定门外大街 136 号皇城国际大厦 A 座 8 楼 邮编: 100011
发 行 北京时代华文书局图书发行部 (010) 64267120 64267397
印 制 北京亚通印刷有限责任公司 (010) 52891770
规 格 710mm×1000mm 1/16
印 张 114.75
字 数 1228 千字
版 次 2014 年 3 月第 1 版 2014 年 3 月第 1 次印刷
书 号 ISBN 978-7-80769-198-3
定 价 148.00 元 (全四册)

目 录

第二卷·世家

卷三十一·吴太伯..... 381

吴太伯 / 吴王寿梦 / 诸樊 / 延陵季子 / 吴王余祭
余 昧 / 吴王僚 / 阖 庐 / 夫 差

卷三十二·齐太公..... 406

太公吕望 / 襄公诸兒 / 桓公小白 / 孝公昭 / 昭公潘
懿公商人 / 惠公元 / 顷公无野 / 灵公环 / 庄公光
景公杵臼 / 晏孺子 / 悼公阳生 / 简公壬 / 平公骈
康公贷

卷三十三·鲁周公..... 434

周公旦 / 鲁公伯禽 / 考公酋 / 炀公熙 / 幽公宰
魏 公 / 厉公擢 / 献公具 / 真公湣 / 武公敖
懿公戏 / 伯 御 / 孝公称 / 惠公弗湟 / 隐公息
桓公子允 / 庄公同 / 湣公开 / 釐公子申 / 文公兴
宣公佞 / 成公黑肱 / 襄公午 / 昭公稠 / 定公宋
哀公将 / 悼公宁 / 平公叔 / 顷公緡

卷三十四·燕召公奭..... 459

惠 侯 / 釐 侯 / 顷 侯 / 庄 公 / 襄 公 / 桓 公
武 公 / 惠 公 / 悼 公 / 平 公 / 献 公 / 孝 公
釐 公 / 文 公 / 易 王 / 燕 吟 / 燕昭王
惠 王 / 武成王 / 孝 王 / 今王喜

卷三十五·管蔡..... 470

管叔鲜 / 蔡叔度 / 曹叔振铎

卷三十六·陈杞..... 479

陈胡公满 / 申公犀侯 / 相公皋羊 / 孝公突
慎公圉戎 / 幽公宁 / 釐公孝 / 武公灵 / 夷公说
平公變 / 文公圉 / 桓公鲍 / 厉公佗 / 利公跃
庄公林 / 宣公杵臼 / 穆公款 / 共公朔 / 灵公平国
惠公吴 / 怀公柳 / 湣公越 / 杞东楼公

卷三十七·卫康叔…………… 489

卫康叔封 / 康 伯 / 考 伯 / 嗣 伯 / 靖 伯
 贞 伯 / 顷 侯 / 釐 侯 / 共 伯 / 武公和 / 庄公扬
 桓公完 / 宣公晋 / 惠公朔 / 懿公赤 / 戴公申 / 文公燬
 成公郑 / 穆公邈 / 定公臧 / 献公衎 / 殇公秋 / 襄公恶
 灵公元 / 出公辄 / 庄公蒯聩 / 卫君起 / 悼公 / 敬公弗
 昭公纠 / 怀公亶 / 慎 公 / 声公训 / 成侯邈 / 平 侯
 嗣 君 / 怀 君 / 元 君 / 君 角

卷三十八·宋微子…………… 502

宋微子开 / 箕 子 / 比 干 / 微 仲 / 宋公稽
 丁公申 / 湣公共 / 炀公熙 / 厉公鮒祀 / 釐公举
 惠 公 / 哀 公 / 戴 公 / 武公司空 / 宣公力
 穆公和 / 殇公与夷 / 庄公冯 / 湣公捷 / 桓公御说
 襄公兹甫 / 成公王臣 / 昭公杵臼 / 文公鲍革 / 共公瑕
 平公成 / 元公佐 / 景公头曼 / 昭公特 / 悼公购由
 休公田 / 辟公辟兵 / 剔 成 / 君 偃

卷三十九·晋…………… 522

晋唐叔虞 / 晋侯燮 / 武侯宁族 / 成侯服 / 厉侯福
 靖侯宜臼 / 釐侯司徒 / 献侯籍 / 穆侯费王
 殇 叔 / 文侯仇 / 昭侯伯 / 孝侯平 / 鄂侯郤
 哀侯光 / 小子侯 / 晋侯缙 / 武公称 / 献公诡诸
 惠公夷吾 / 怀公圉 / 文公重耳 / 襄公欢
 灵公夷皋 / 成公黑臀 / 景公据 / 厉公寿曼
 悼公周 / 平公彪 / 昭公夷 / 顷公去疾 / 定公午
 出公凿 / 哀公骄 / 幽公柳 / 烈公止 / 孝公颀 / 静公俱酒

卷四十·楚…………… 562

熊 绎 / 熊 渠 / 熊 挚红 / 熊 延 / 熊 勇
 熊 严 / 熊 霜 / 熊 徇 / 熊 罾 / 若敖熊仪
 霄敖熊坎 / 蚡冒熊眇 / 武王熊通 / 文王熊赀
 庄敖熊麇 / 成王恽 / 穆王商臣 / 庄王侣 / 共王审
 康王招 / 郢敖员 / 灵王围 / 平王熊居 / 昭王珍
 惠王章 / 简王中 / 声王当 / 悼王熊疑 / 肃王臧
 宣王熊良夫 / 威王熊商 / 怀王熊槐 / 顷襄王横
 考烈王熊元 / 幽王悍 / 王负刍

卷四十一·越王句践…………… 600

王句践 / 王颢与 / 王不寿 / 王 翁 / 王 翳
王之侯 / 王无彊 / 范 蠡

卷四十二·郑…………… 615

郑桓公友 / 武公掘突 / 庄公寤生 / 厉公突 / 昭公忽
子 亶 / 郑 子 / 文公躒 / 繆公兰 / 灵公夷
襄公坚 / 悼 公 / 成公睂 / 釐公恠 / 简公嘉
定公宁 / 献公蛩 / 声公胜 / 縠公貜 / 郑君乙

卷四十三·赵…………… 631

赵 夙 / 赵 衰 / 赵 盾 / 赵 朔 / 赵 武
赵景叔 / 简子鞅 / 襄子毋恤 / 献侯浣 / 烈侯籍
武 公 / 敬侯章 / 成侯种 / 赵肃侯 / 武灵王雍
惠文王何 / 孝成王丹 / 悼襄王偃 / 幽缪王迁

卷四十四·魏…………… 674

毕 万 / 魏武子 / 魏悼子 / 魏 绛 / 魏献子
魏 侈 / 魏桓子 / 魏文侯都 / 武侯击 / 惠王罃
襄 王 / 哀 王 / 昭 王 / 安釐王 / 景湣王 / 王 假

卷四十五·韩…………… 698

韩武子 / 韩献子 / 韩宣子 / 贞 子 / 简 子
庄 子 / 康 子 / 武 子 / 景侯虔 / 列侯取
文 侯 / 哀 侯 / 懿 侯 / 昭 侯 / 宣惠王
襄王仓 / 釐王咎 / 桓惠王 / 王 安

卷四十六·田敬仲完…………… 709

田敬仲完 / 田稚孟夷 / 湣孟庄 / 文子须无
桓子无宇 / 武子开 / 釐子乞 / 成子常 / 襄子盘
庄子白 / 齐侯太公和 / 桓公午 / 威王因齐
宣王辟彊 / 湣王地 / 襄王法章 / 齐王建

卷四十七·孔子…………… 729

孔 丘 / 孔 鲤 / 孔 伋 / 孔 白 / 孔 求
孔 箕 / 孔 穿 / 孔 慎 / 孔 鲋 / 孔 襄

孔 忠 / 孔 武 / 孔延年 / 孔安国 / 孔 印
孔 驩

卷四十八·陈胜 吴广 763

卷四十九·外戚后妃..... 776

卷 五 十 · 楚元王刘交..... 792

楚元王交 / 夷王郢 / 王 戊 / 楚文王礼 / 安王道
襄王注 / 王 纯 / 赵王遂 / 河间文王辟彊 / 哀王福

卷五十一·荆王刘贾 燕王刘泽 796

卷五十二·齐悼惠王刘肥..... 801

卷五十三·萧何..... 812

卷五十四·曹参..... 818

卷五十五·留侯张良..... 827

卷五十六·陈平..... 841

卷五十七·绛侯周勃 周亚夫 851

卷五十八·梁孝王刘武..... 864

梁孝王刘武 / 梁平王襄 / 济川王明 / 济东王彭离
阳哀王定 / 济阴哀王不识

卷五十九·五宗世家..... 874

河间献王德 / 临江哀王闾于 / 临江闵王荣
鲁共王余 / 江都易王非 / 胶西于王端 / 赵王彭祖
中山靖王胜 / 长沙定王发 / 广川惠王越
胶东康王寄 / 清河哀王乘 / 常山宪王舜

卷 六 十 · 三王世家..... 883

齐王刘闳 / 燕王刘旦 / 广陵王刘胥

吴太伯

吴太伯 吴王寿梦 诸樊 延陵季子 吴王余祭 余昧
吴王僚 阖庐 夫差

【索隐】《系家》者，记诸侯本系也，言其下及子孙常有国。故《孟子》曰“陈仲子，齐之系家”。又董仲舒曰“王者封诸侯，非官之也，得以代为家也”。

吴太伯^①，太伯弟仲雍^②，皆周太王之子，而王季历之兄也。季历贤，而有圣子昌，太王欲立季历以及昌，于是太伯、仲雍二人乃奔荆蛮，文身断发，示不可用^③，以避季历。季历果立，是为王季，而昌为文王。太伯之奔荆蛮，自号句吴^④。荆蛮义之，从而归之千余家，立为吴太伯。

①【集解】韦昭曰：“后武王追封为吴伯，故曰吴太伯。”【索隐】《国语》曰“黄池之会，晋定公使谓吴王夫差曰‘夫命圭有命，固曰吴伯，不曰吴王’”，是吴本伯爵也。范甯解《论语》曰“太者，善大之称；伯者，长也。周太王之元子故曰太伯”。称仲雍、季历，皆以字配名，则伯亦是字，又是爵，但其名史籍先阙耳。【正义】吴，国号也。太伯居梅里，在常州无锡县东南六十里。至十九世孙寿梦居之，号句吴。寿梦卒，诸樊南徙吴。至二十一代孙光，使子胥筑阖闾城都之，今苏州

也。②【索隐】伯、仲、季是兄弟次第之字。若表德之字，意义与名相符，则《系本》曰“吴孰哉居蕃离”，宋忠曰“孰哉，仲雍字。蕃离，今吴之余暨也”。解者云雍是熟食，故曰雍字孰哉也。③【集解】应劭曰：“常在水中，故断其发，文其身，以象龙子，故不见伤害。”【正义】江熙云：“太伯少弟季历生文王昌，有圣德，太伯知其必有天下，故欲传国于季历。以太王病，托采药于吴越，不反。太王薨而季历立，一让也；季历薨而文王立，二让也；文王薨而武王立，遂有天下，三让也。又释云：太王病，托采药，生不事之以礼，一让也；太王薨而不反，使季历主丧，不葬之以礼，二让也；断发文身，示不可用，使历主祭祀，不祭之以礼，三让也。”④【集解】宋忠曰：“句吴，太伯始所居地名。”【索隐】荆者，楚之旧号，以州而言之曰荆。蛮者，闽也。南夷之名；蛮亦称越。此言自号句吴，吴名起于太伯，明以前未有吴号。地在楚越之界，故称荆蛮。颜师古注《汉书》，以吴言“句”者，夷语之发声，犹言“于越”耳。此言“号句吴”，当如颜解。而注引宋忠以为地名者，《系本·居篇》曰“孰哉居蕃离，孰姑徙句吴”，宋氏见《史记》有“太伯自号句吴”之文，遂弥缝解彼云是太伯始所居地名。裴氏引之，恐非其义。蕃离既有其地，句吴何总不知真实？吴人不闻别有城邑曾名句吴，则《系本》之文或难依信。《吴地记》曰：“泰伯居梅里，在阖闾城北五十里许。”

太伯卒^①，无子，弟仲雍立，是为吴仲雍。仲雍卒^②，子季简立。季简卒，子叔达立。叔达卒，子周章立。是时周武王克殷，求太伯、仲雍之后，得周章。周章已君吴，因而封之。乃封周章弟虞仲于周之北故夏虚^③，是为虞仲^④，列为诸侯。

①【集解】《皇览》曰：“太伯冢在吴县北梅里聚，去城十里。”

②【索隐】《吴地记》曰：“仲雍冢在吴郡常熟县西海虞山上，与言偃冢并列。”③【集解】徐广曰：“在河东大阳县。”

④【索隐】夏都安邑，虞仲都大阳之虞城，在安邑南，故曰夏虚。《左传》曰“太伯、虞仲，太王之昭”，则虞仲是太王之子必也。又《论语》称“虞仲、夷逸隐居放言”，是仲雍称虞仲。今周章之弟亦称虞仲者，盖周章之弟字仲，始封于虞，故曰虞仲。则仲雍本字仲，而为虞之始祖，故后代亦称虞仲，所以祖与孙同号也。

周章卒，子熊遂立，熊遂卒，子柯相立^①。柯相卒，子彊鸠夷立。彊鸠夷卒，子余桥疑吾立^②。余桥疑吾卒，子柯卢立。柯卢卒，子周繇立^③。周繇卒，子屈羽立^④。屈羽卒，子夷吾立。夷吾卒，子禽处立。禽处卒，子转立^⑤。转卒，子颇高立^⑥。颇高卒，子句卑立^⑦。是时晋献公灭周北虞公，以开晋伐虢也^⑧。句卑卒，子去齐立。去齐卒，子寿梦立^⑨。寿梦立而吴始益大，称王。

①【正义】柯音歌。相音相匠反。②【正义】桥音蹻骄反。

③【正义】繇音遥，又音由。④【正义】屈，居勿反。⑤【索隐】

譙周《古史考》云“柯转”。⑥【索隐】《古史考》作“颇梦”。

⑦【索隐】《古史考》云“毕轸”。⑧【索隐】《春秋经》

僖公五年“冬，晋人执虞公”。左氏二年《传》曰“晋荀息请以屈产之乘与垂棘之璧假道伐虢，宫之奇谏，不听。虞公许之，且请先伐之，遂伐虢，灭下阳”。五年《传》曰“晋侯复假道伐虢，宫之奇谏，不听。以其族行，曰‘虞不腊矣’。八月甲午，晋侯围上阳。冬十有二月，灭虢。师还，遂袭虞灭之”也。⑨【正义】梦，莫公反。

自太伯作吴，五世而武王克殷，封其后为二：其一虞，在中国；其一吴，在夷蛮。十二世而晋灭中国之虞。中国之虞灭二世，而夷蛮之吴兴^①。大凡从太伯至寿梦十九世^②。

①【正义】中国之虞灭后二世，合七十一年，至寿梦而兴大，

称王。②【索隐】寿梦是仲雍十九代孙也。

王寿梦二年^①，楚之亡大夫申公巫臣怨楚将子反而奔晋，自晋使吴，教吴用兵乘车，令其子为吴行人^②，吴于是始通于中国。吴伐楚。十六年，楚共王伐吴，至衡山^③。

①【索隐】自寿梦已下始有其年，《春秋》唯记卒年。计二年当成七年也。②【集解】服虔曰：“行人，掌国宾客之礼籍，以待四方之使，宾大客，受小客之币辞。”【索隐】《左传》鲁成二年曰“巫臣使齐，及郑，使介反币，而以夏姬行，遂奔晋”。七年《传》曰“子重、子反杀巫臣之族而分其室，巫臣遗二子书曰‘余必使尔罢于奔命以死’。巫臣使于吴，吴子寿梦悦之，乃通吴于晋，教吴乘车，教之战阵，教之叛楚，寘其子狐庸焉，使为行人。吴始伐楚，伐巢，伐徐。马陵之会，吴人州来，子重、子反于是乎一岁七奔命”是。③【集解】杜预曰：“吴兴乌程县南也。”【索隐】《春秋经》襄三年“楚公子婴齐帅师伐吴”，《左传》曰“楚子重伐吴，为简之师，克鸠兹，至于衡山”也。

二十五年，王寿梦卒^①。寿梦有子四人，长曰诸樊^②，次曰余祭，次曰余昧^③，次曰季札^④。季札贤，而寿梦欲立之，季札让不可，于是乃立长子诸樊，摄行事当国。

①【索隐】襄十二年《经》曰“秋九月，吴子乘卒”。《左传》曰寿梦。计从成六年至此，正二十五年。《系本》曰“吴孰姑徙句吴”。宋忠曰“孰姑，寿梦也”。代谓祝梦乘诸也。寿孰音相近，姑之言诸也，《毛诗传》读“姑”为“诸”，知孰姑、寿梦是一人，又名乘也。②【索隐】《春秋经》书“吴子遏”，《左传》称“诸樊”，盖遏是其名，诸樊是其号。《公羊传》“遏”作“謁”。③【索隐】《左传》曰“阖戕戴吴”。杜预曰“戴吴，余祭也”。又襄二十八年《左传》，齐庆封奔吴，句余与之朱方。杜预曰“句余，吴子夷末也”。计余祭以襄二十九

年卒，则二十八年赐庆封邑，不得是夷末。且句余、余祭或谓是一人，夷末惟《史记》《公羊》作“余昧”，《左氏》及《谷梁》并为“余祭”。夷末、句余音字各异，不得为一，或杜氏误耳。【正义】祭，侧界反。昧，莫葛反。④【索隐】《公羊传》曰：“謁也，余祭也，夷末也，与季子同母者四人。季子弱而才，兄弟皆爱之，同欲以为君，兄弟递相为君，而致国乎季子。故謁也死，余祭也立；余祭也死，夷末也立；夷末也死，则国宜之季子，季子使而亡焉。僚者长庶也，即之。闾閻曰：‘将从先君之命与，则国宜之季子也；如不从君之命，则宜立者我也。僚恶得为君乎？’于是使专诸刺僚。”《史记》寿梦四子，亦约《公羊》文，但以僚为余昧子为异耳。《左氏》其文不明，服虔用《公羊》，杜预依《史记》及《吴越春秋》。下注徐广引《系本》曰“夷昧及僚，夷昧生光”，检系本今无此语。然按左狐庸对赵文子，谓“夷末甚德而度，其天所启也，必此君之子孙实终之”。若以僚为末子，不应此言。又光言“我王嗣”，则光是夷昧子，且明是庶子。

王诸樊元年^①，诸樊已除丧，让位季札。季札谢曰：“曹宣公之卒也，诸侯与曹人不义曹君^②，将立子臧，子臧去之，以成曹君^③，君子曰^④‘能守节矣’。君义嗣^⑤，谁敢干君！有国，非吾节也。札虽不材，愿附于子臧之义。”吴人固立季札，季札弃其室而耕，乃舍之^⑥。秋，吴伐楚，楚败我师。四年，晋平公初立^⑦。

①【集解】《世本》曰“诸樊徙吴”也。②【集解】服虔曰：“宣公，曹伯卢也，以鲁成公十三年会晋侯伐秦，卒于师。曹君，公子负刍也。负刍在国，闻宣公卒，杀太子而自立，故曰不义之也。”③【集解】服虔曰：“子臧，负刍庶兄。”【索隐】成十三年《左传》曰：“曹宣公卒于师。曹人使公子负刍守，使公子欣时逆丧。秋，负刍杀其太子而自立。”杜预曰：“皆宣

公庶子也。负刍，成公也。欣时，子臧也。”十五年《传》曰：“会于戚，讨曹成公也，执而归诸京师。诸侯将见子臧于王而立之。子臧曰：‘前志有之，曰圣达节，杜预曰：圣人应天命，不拘常礼也。次守节，杜预曰：谓贤者也。下失节。杜预曰：愚者，妄动也。为君，非吾节也。虽不能圣，敢失守乎？’遂逃奔宋。”④【索隐】君子者，左丘明所为史评仲尼之词，指仲尼为君子也。⑤【集解】王肃曰：“义，宜也。嫡子嗣国，得礼之宜。”杜预曰：“诸樊嫡子，故曰义嗣。”⑥【索隐】“诸樊元年已除丧”至“乃舍之”，皆襄十四年《左氏传》文。【正义】舍音捨。⑦【索隐】《左传》襄十六年春“葬晋悼公，平公即位”是也。

十三年，王诸樊卒①。有命授弟余祭，欲传以次，必致国于季札而止，以称先王寿梦之意，且嘉季札之义，兄弟皆欲致国，令以渐至焉。季札封于延陵②，故号曰延陵季子。

①【索隐】《春秋经》襄二十五年：“十有二月，吴子遏伐楚，门于巢，卒。”《左传》曰：“吴子诸樊伐楚，以报舟师之役，门于巢。巢牛臣曰：‘吴王勇而轻，若启之，将亲门，我获射之，必殪。是君也死，疆其少安。’从之。吴子门焉，牛臣隐于短墙以射之，卒。”②【索隐】襄三十一年《左传》赵文子问于屈狐庸曰“延州来季子其果立乎”，杜预曰“延州来，季札邑也”。昭二十七年《左传》曰“吴子使延州来季子聘于上国”，杜预曰“季子本封延陵，后复封州来，故曰延州来”。成七年《左传》曰“吴入州来”，杜预曰“州来，楚邑，淮南下蔡县是”。昭十三年《传》“吴伐州来”，二十三年《传》“吴灭州来”。则州来本为楚邑，吴光伐灭，遂以封季子也。《地理志》云会稽毗陵县，季札所居。太康《地理志》曰：“故延陵邑，季札所居，栗头有季札祠”。《地理志》沛郡下蔡县云，古

州来国，为楚所灭，后吴取之，至夫差，迁昭侯于此。《公羊传》曰“季子去之延陵，终身不入吴国”，何休曰“不入吴朝廷也”。此云“封于延陵”，谓因而赐之以菜邑。而杜预《春秋释例·土地名》则云“延州来，阙”，不知何故而为此言也。

王余祭三年，齐相庆封有罪，自齐来奔吴。吴予庆封朱方之县^①，以为奉邑，以女妻之，富于在齐。

①【集解】《吴地记》曰：“朱方，秦改曰丹徒。”

四年，吴使季札聘于鲁^①，请观周乐^②。为歌《周南》、《召南》^③。曰：“美哉，始基之矣^④，犹未也^⑤。然勤而不怨^⑥。”歌《邶》、《鄘》、《卫》^⑦。曰：“美哉，渊乎，忧而不困者也^⑧。吾闻卫康叔、武公之德如是，是其卫风乎^⑨？”歌《王》^⑩。曰：“美哉，思而不惧，其周之东乎^⑪？”歌《郑》^⑫。曰：“其细已甚，民不堪也，是其先亡乎^⑬？”歌《齐》。曰：“美哉，泱泱乎大风也哉^⑭。表东海者，其太公乎^⑮？国未可量也^⑯。”歌《豳》。曰：“美哉，荡荡乎，乐而不淫^⑰，其周公之东乎^⑱？”歌《秦》。曰：“此之谓夏声。夫能夏则大，大之至也，其周之旧乎^⑲？”歌《魏》。曰：“美哉，沍沍乎^⑳，大而宽^㉑，俭而易，行以德辅，此则盟主也^㉒。”歌《唐》。曰：“思深哉，其有陶唐氏之遗风乎？不然，何忧之远也^㉓？非令德之后，谁能若是！”歌《陈》。曰：“国无主，其能久乎^㉔？”自《邶》以下，无讥焉^㉕。歌《小雅》^㉖。曰：“美哉，思而不貳^㉗，怨而不言^㉘，其周德之衰乎^㉙？犹有先王之遗民也^㉚。”歌《大雅》^㉛。曰：“广哉，熙熙乎^㉜，曲而有直体^㉝，其文王之德乎？”歌《颂》^㉞。曰：“至矣哉^㉟，直而不倨^㊱，曲而不诎^㊲，近而不偪^㊳，远而不携^㊴，迁而不淫^㊵，复而不厌^㊶，哀而不愁^㊷，乐而不荒^㊸，用而不匮^㊹，广而不宣^㊺，

施而不费^{④⑥}，取而不贪^{④⑦}，处而不底^{④⑧}，行而不流^{④⑨}。五声和，八风平^{⑤⑩}，节有度，守有序^{⑤⑪}，盛德之所同也^{⑤⑫}。”见舞象箏、南籥者^{⑤⑬}，曰：“美哉，犹有感^{⑤⑭}。”见舞大武^{⑤⑮}，曰：“美哉，周之盛也其若此乎？”见舞韶护者^{⑤⑯}，曰：“圣人之弘也^{⑤⑰}，犹有惭德，圣人之难也^{⑤⑱}！”见舞大夏^{⑤⑲}，曰：“美哉，勤而不德^{⑥⑰}！非禹其谁能及之？”见舞招箏^{⑥⑱}，曰：“德至矣哉，大矣^{⑥⑲}，如天之无不燾也^{⑥⑳}，如地之无不载也，虽甚盛德，无以加矣。观止矣，若有他乐，吾不敢观^{⑥㉑}。”

①【集解】在《春秋》鲁襄公二十九年。②【集解】服虔曰：“周乐，鲁所受四代之乐也。”杜预曰：“鲁以周公故，有天子礼乐。”③【集解】杜预曰：“此皆各依其本国歌所常用声曲。”

④【集解】王肃曰：“言始造王基也。”⑤【集解】贾逵曰：“言未有雅、颂之成功也。”杜预曰：“犹有商纣，未尽善也。”

⑥【集解】杜预曰：“未能安乐，然其音不怨怒。”⑦【集解】杜预曰：“武王伐纣，分其地为三监。三监叛，周公灭之，并三监之地，更封康叔，故三国尽被康叔之化。”⑧【集解】贾逵曰：“渊，深也。”杜预曰：“亡国之音哀以思，其民困。卫康叔、武公德化深远，虽遭宣公淫乱，懿公灭亡，民犹秉义，不至于困。”

⑨【集解】贾逵曰：“康叔遭管叔、蔡叔之难，武公罹幽王、褒姒之忧，故曰康叔、武公之德如是。”杜预曰：“康叔，武公，皆卫之令德君也。听声以为别，故有疑言。”

⑩【集解】服虔曰：“王室当在《雅》，衰微而列在《风》，故国人犹尊之，故称《王》，犹《春秋》之王人也。”杜预曰：“王，黍离也。”⑪【集解】服虔曰：“平王东迁雒邑。”杜预曰：“宗周殒灭，故忧思；犹有先王之遗风，故不惧也。”【正义】思音肆。

⑫【集解】贾逵曰：“郑风，东郑是。”⑬【集解】服虔曰：“其风细弱已甚，摄于大国之间，无远虑持久之

风，故曰民不堪，将先亡也。”⑭【集解】服虔曰：“泱泱，舒緩深远，有大和之意。其诗风刺，辞约而义微，体疏而不切，故曰大风。”【索隐】泱，于良反。泱泱犹汪汪洋，美盛貌也。杜预曰“弘大之声”也。⑮【集解】王肃曰：“言为东海之表式。”⑯【集解】服虔曰：“国之兴衰，世数长短，未可量也。”杜预曰：“言其或将复兴。”⑰【集解】贾逵曰：“荡然无忧，自乐而不荒淫也。”⑱【集解】杜预曰：“周公遭管蔡之变，东征，为成王陈后稷先公不敢荒淫，以成王业，故言其周公东乎。”⑲【集解】杜预曰：“秦仲始有车马礼乐，去戎狄之音而有诸夏之声，故谓之夏声。及襄公佐周平王东迁而受其故地，故曰周之旧也。”⑳【索隐】汎音冯，又音泛。杜预曰：“中庸之声。”㉑【索隐】《左传》作“大而婉”。杜预曰：“婉，约也。大而约，则俭节易行。”宽字宜读为“婉”也。㉒【集解】徐广曰：“盟，一作‘明’。”驷案：贾逵曰“其志大，直而有曲体，归中和中庸之德，难成而实易行。故曰以德辅此，则盟主也”。杜预曰“惜其国小而无明君”。【索隐】注引徐广曰“盟，一作‘明’”。按：《左传》亦作“明”，此以听声知政，言其明听耳，非盟会也。㉓【集解】杜预曰：“晋本唐国，故有尧之遗风。忧深思远，情发于声也。”㉔【集解】杜预曰：“淫声放荡，无所畏忌，故曰国无主。”㉕【集解】服虔曰：“郕以下，及曹风也。其国小，无所刺讥。”㉖【集解】杜预曰：“《小雅》，小正，亦乐歌之章。”㉗【集解】杜预曰：“思文武之德，无贰叛之心也。”㉘【集解】王肃曰：“非不能言，畏罪咎也。”㉙【集解】杜预曰：“衰，小也。”㉚【集解】杜预曰：“谓有殷王余俗，故未大衰。”㉛【集解】杜预曰：“《大雅》，陈文王之德，以正天下。”㉜【集解】杜预曰：“熙熙，和乐声。”㉝【集解】杜预曰：“论其声。”㉞【集解】杜预曰：“颂者，以其成功告于神明。”㉟【集解】贾逵曰：“言道备至也。”㊱【集解】杜预曰：“倨，傲也。”㊲【集解】杜预曰：

“诎，挠也。”③⑧【集解】杜预曰：“谦，退也。”③⑨【集解】杜预曰：“携，贰也。”④⑩【集解】服虔曰：“迁，徙也。文王徙酆，武王居鄩。”杜预曰：“淫，过荡也。”④⑪【集解】杜预曰：“常日新也。”④⑫【集解】杜预曰：“知命也。”④⑬【集解】杜预曰：“节之以礼也。”④⑭【集解】杜预曰：“德弘大。”④⑮【集解】杜预曰：“不自显也。”④⑯【集解】杜预曰：“因民所利而利之。”④⑰【集解】杜预曰：“义然后取。”④⑱【集解】杜预曰：“守之以道。”④⑲【集解】杜预曰：“制之以义。”⑤⑩【集解】杜预曰：“宫、商、角、徵、羽谓之五声。八方之气谓之八风。”⑤⑪【集解】杜预曰：“八音克谐，节有度也。无相夺伦，守有序也。”⑤⑫【集解】杜预曰：“颂有殷、鲁，故曰盛德之所同。”⑤⑬【集解】贾逵曰：“象，文王之乐武象也。箭，舞曲也。南箭，以箭舞也。”【索隐】箭音朔，又素交反。⑤⑭【集解】服虔曰：“憾，恨也。恨不及己以伐纣而致太平也。”【索隐】憾读为“憾”，字省耳，胡暗反。⑤⑮【集解】贾逵曰：“大武，周公所作武王乐也。”⑤⑯【集解】贾逵曰：“韶护，殷成汤乐大护也。”⑤⑰【集解】贾逵曰：“弘，大也。”⑤⑱【集解】服虔曰：“惭于始伐而无圣佐，故曰圣人之难也。”⑤⑲【集解】贾逵曰：“夏禹之乐大夏也。”⑥⑩【集解】服虔曰：“禹勤其身以治水土也。”⑥⑪【集解】服虔曰：“有虞氏之乐大韶也。”【索隐】“韶”“箫”二字体变耳。⑥⑫【集解】服虔曰：“至，帝王之道极于韶也。尽美尽善也。”⑥⑬【集解】贾逵曰：“焘，覆也。”⑥⑭【集解】服虔曰：“周用六代之乐，尧曰《咸池》，黄帝曰《云门》。鲁受四代，下周二等，故不舞其二。季札知之，故曰有他乐吾不敢请。”

去鲁，遂使齐。说晏平仲曰：“子速纳邑与政^①。无邑无政，乃免于难。齐国之政将有所归；未得所归，难未息也。”故晏子因陈桓子以纳政与邑，是以免于栾高之难^②。

①【集解】服虔曰：“入邑与政职于公，不与国家之事。”